

ALDY STOP MOBING CGS LI
ANTIKORUPCIJSKA
MREŽA ORGANIZACIJA
CIVILNOG DRUŠTVA

ACCOUNT



U SLUČAJU POTREBE NAZBITI STAVI

PREDSTAVNIČKI DOM PARLAMENTA FBiH ODOBRILO NACRT ZAKONA O ZAŠTITI PRIJAVITELJA KORUPCIJE

Predstavnički dom Federalnog parlamenta odobrio je većinom glasova na vanrednoj sjednici Nacrt zakona o zaštiti prijavitelja korupcije. Taj zakon predložila je Federalna vlada, a u izradi nacrta, među ostalima učestvovali su i predstavnici Antikorupcione mreže nevladinih organizacija u BiH – ACCOUNT.

Cilj zakona je suzbijanje korupcije i osiguranje učinkovitog sistema zaštite prijavitelja od bilo kojeg oblika ugrožavanja ili povrede prava koja bi mogla biti u vezi s prijavom korupcije. Svaka osoba ima pravo, u dobroj vjeri, prijaviti bilo koji oblik korupcije u javnom ili privatnom sektoru, za koji sazna na bilo koji način.

Direktor Udruženja JUSTICIA i član Radne grupe Ministarstva pravde FBiH za izradu zakona o zaštiti prijavitelja korupcije Ervin Turbić smatra da ovaj nacrt Zakona donosi dobra rješenja jer će građani FBiH napokon, imati pravnu zaštitu u slučaju prijavljivanja korupcije. Tu zaštitu ranije su imali građani RS-a i uposlenici institucija BiH.

„Što se tiče daljnjih koraka, pretpostavljam da će Parlament FBiH naložiti Ministarstvu raspisivanje javnih rasprava u najkraćem zakonom predviđenom roku“ - rekao je Ervin Turbić.

Pozvao je sve društvene aktere da se uključe u javnu raspravu kako bi se u konačnici dobio zakon koji će pružiti najbolju zaštitu prijaviteljima korupcije u Federaciji.

Na koji način i u kojem slučaju zakon nudi zaštitu zviždačima?



Svaka osoba ima pravo, u dobroj vjeri, prijaviti bilo koji oblik korupcije u javnom ili privatnom sektoru, za koji sazna na bilo koji način.

Zabranjena je zloupotreba prijavljivanja korupcije dostavljanjem informacija za koje prijavitelj u trenutku prijavljivanja zna da nisu istinite. U slučaju prijave korupcije, odgovorna ili ovlaštena osoba dužna je poduzeti sve mjere s ciljem otkrivanja, sprječavanja, suzbijanja i kažnjavanja svih oblika korupcije, te zaštite prijavitelja.

Kako je definisano, prijava u dobroj vjeri je ona koja sadrži činjenice na osnovu kojih prijavitelj sumnja da je pokušana ili izvršena korupcija o kojima ima saznanja i koje smatra istinitim.

Zaštićeno prijavljivanje može biti interno i eksterno. Internim prijavitelj obavještava odgovornu ili ovlaštenu osobu o činjenicama na osnovu kojih sumnja da je kod subjekta kojim odgovorna osoba rukovodi, pokušana ili izvršena korupcija. Eksterno prijavljivanje vrši se, između ostalog, u slučaju da prijavitelj ima razloga vjerovati da se odgovorna ili ovlaštena osoba kojoj se podnosi prijava može direktno ili indirektno dovesti u vezu s korupcijom.

Zaštićenim prijavljivanjem smatra se i objavljivanje putem sredstava javnog informiranja ili na drugi način činjenje javno dostupnim informacija koje ukazuju na pokušaj korupcije, da je ona izvršena ili je u toku. U postupku sudske zaštite prava prijavitelja i prava drugih osoba koje trpe štetnu radnju nadležan je Općinski sud prema mjestu nastanka štetne radnje ili prema mjestu prebivališta, odnosno boravišta tužitelja.

Teret dokazivanja je na tuženom koji dokazuje zakonitost, cjelishodnost i objektivnu opravdanost ili nepostojanje akta, činjenja ili nečinjenja koji su u tužbi označeni kao štetna radnja.

SEKTORSKA GRUPA ZVIŽDAČI

Nacrt zakona o zaštiti prijavitelja korupcije u Federaciji BiH predstavljen i na Forumu o zaštiti zviždača



Forum o zaštiti zviždača, Sarajevo

Sektorska grupa Zviždači, na čelu sa Udruženjem JUSTICIA koje je i lider ove grupe, organizovala je 14. juna Forum o zaštiti zviždača u Sarajevu.

Forum je organizovan u sklopu Antikorupcione mreže nevladinih organizacija u BiH – ACCOUNT, a njegovom organizacijom željelo se doprinijeti unapređenju saradnje između predstavnika regulatora s jedne i civilnog sektora i medija s druge strane na izgradnji efikasnog sistema zaštite prijavitelja korupcije, sa posebnim osvrtom na izradu Nacrta zakona o zaštiti prijavitelja korupcije u institucijama Federacije BiH.

Učesnici Forumu bili su predstavnici Radne grupe Ministarstva pravde Federacije BiH, koji su bili angažovani na izradi Nacrta zakona o zaštiti lica koja prijavljuju korupciju u Federaciji BiH, organizacije civilnog društva – članice Sektorske grupe „Zviždači“ ACCOUNT mreže, predstavnici Vlade Federacije BiH, članovi antikorupcijskih timova kantonalnih vlada, kao i mediji – članovi medijskog pool-a ACCOUNT mreže.

Predstavnici Radne grupe za izradu Nacrta zakona o zaštiti prijavitelja korupcije u Federaciji BiH, zvanično su predstavili Nacrt zakona, koji je 20. juna 2018. godine koji je usvojen u prvom čitanju u Predstavničkom domu Parlamenta Federacije BiH.

SEKTORSKA GRUPA ZAPOŠLJAVANJE

Prezentovana Analiza zakonodavnog okvira u oblasti zapošljavanja u javnom sektoru



Sastanak u Vladi Županije Posavske



Sastanak u Vladi USK

Helsinški odbor za ljudska prava kao leaderska organizacija Sektorske grupe zapošljavanje je u okviru provođenja završnih aktivnosti na projektu "Jednake šanse – transparentnost u zapošljavanju u javnom sektoru II", u periodu od 06. do 27. juna 2018. godine održala niz sastanaka sa predstavnicima kantonalnih vlasti (premijerima, predstavnicima Timova za borbu protiv korupcije i sl.).

Na sastancima su prezentovani nalazi izrađene Analize zakonodavnog okvira u oblasti zapošljavanja u javnom sektoru, sa posebnim akcentom na postojanje pravne regulative koja bi uređivala način provođenja usmenog intervjua i bodovanja kandidata pri zapošljavanju u javnim službama. Analiza je obuhvatila zakonodavni okvir u oblasti zapošljavanja u javnom sektoru u sljedećim kantonima: Srednjobosanski, Posavski, Zeničko-dobojski, Tuzlanski, Unsko-sanski, Bosansko-podrinjski i Kanton 10. Helsinški odbor za ljudska prava je na sastancima još jednom, uz popratno pismo predao i Pravilnik o načinu provođenja usmenog intervjua i zapošljavanja u javnim službama, koji je izrađen u sklopu mreže ACCOUNT, kao model koji se može koristiti za unapređenje podzakonske regulative u oblasti zapošljavanja.

Nastavljena obuka o identifikaciji koruptivnih rizika u propisima

Predstavnici civilnih organizacija, članice ACCOUNT-a, su u sklopu obuke „Identifikacija koruptivnih rizika u propisima“, koju organizuje Fondacija INFOHOUSE, nastavili diskusiju o prijedlozima za identifikaciju koruptivnih rizika u Zakonu o besplatnoj pravnoj pomoći.

Obuka se realizuje u saradnji s USAID-ovim projektom „*Jačanje institucija vlasti i procesa u Bosni i Hercegovini*“, a sudionici su već ranije prošli nekoliko obuka koje su se odnosile na uočavanje koruptivnih rizika u antikoruptivnim zakonima.

Predstavnici civilnih organizacija dolaze iz Udruženja KAM (Zenica), Centra ženskih prava (Zenica), Udruženja ICVA (Sarajevo), Udruženja ALDI (Goražde), Centri civilnih inicijativa (Bijeljina) i Centra za razvoj civilnog društva (Doboj).



Predstavnici civilnih organizacij na obuci „Identifikacija koruptivnih rizika u propisima“

„*Uvijek je dobro vidjeti i naučiti nešto novo. Do sada samo prepoznavali neke nelogičnost, međutim, sada novo znanje mi daje druge naočare kada su u pitanju zakoni i uočavanje koruptivnih rizika*“, rekao je Milan Mirić, predstavnik ICVA-e.

Mirhunisa Bektaš iz Udruženja KAM se zahvalila organizatorima ove obuke na do sada pruženom znanju u ovoj oblasti.

„*Imala sam prilike prisustvovati različitim vrstama obuka i ovo je sigurno jedna od najkvalitetnijih*“, kazala je Bektaš.

ODRŽAN OKRUGLI STO “IZMJENE I DOPUNE ZAKONA O JAVNIM NABAVKAMA BiH”

Korak ka boljoj i efikasnijoj legislativi



Okrugli sto “Izmjene i dopune Zakona o javnim nabavkama”, Sarajevo

Događaj je pružio priliku predstavnicima poslovne zajednice, ugovornih organa, pravosuđa, revizorskih institucija i trenerima javnih nabavki da daju komentare i preporuke za izmjene Zakona o javnim nabavkama.

Nakon saradnje sa Radnom grupom Vijeća ministara BiH, koja je pripremila izmjene i dopune Zakona o javnim nabavkama BiH, ACCOUNT se aktivno uključio i u proces javne rasprave o predloženim zakonskim rješenjima. Organizacijom okruglog stola pružena je prilika zainteresovanim ciljnim grupama da daju svoje komentare, sugestije i preporuke za daljnje unaprijeđenje zakona. Događaj je okupio predstavnike poslovne zajednice, pravosuđa, revizorskih institucija, grupacije trenera javnih nabavki i nevladinog sektora.

„*U izmjene Zakona su uključeni svi koji mogu doprinijeti njegovom poboljšanju. Nevladin sektor, ACCOUNT i Transparency International, čine sve da zakon bude antikoruptivan. Mi ulažemo ogromnu energiju da se Zakon o javnim nabavkama učini efikasnijim i antikorupcijskim*“, kazao je Eldin Karić, direktor ACCOUNT-a.

Na okruglom stolu, koji je održan 21. juna 2018. u Sarajevu, učestvovali su predstavnici Agencije za javne nabavke, članovi Radne grupe za izmjene i dopune Zakona o javnim nabavkama, predstavnici Suda BiH i Tužilaštva BiH, treneri javnih nabavki, članovi poslovne zajednice, predstavnici institucija, ugovornih organa, itd.



Okrugli sto “Izmjene i dopune Zakona o javnim nabavkama”, Sarajevo

ANTIKORUPCIJSKI FORUM MLADIH

Mladi iz Sarajeva prepoznaju korupciju i spremni su se boriti protiv nje

Učesnici i studenti smatraju da je korupcija dosta zastupljena u obrazovanju, smatraju da smo svi dio koruptivnog lanca i skeptični su prema našem pravosudnom sistemu. Sve ovo zaključci su sa Antikoruptivnog foruma mladih u Sarajevu koji je, uz podršku Američke agencije za međunarodni razvoj (USAID/BiH) i Antikorupcijske mreže organizacija civilnog društva u BiH - ACCOUNT, organizovao Centar za razvoj omladinskog aktivizma CROA.

Forum je održan u prostorijama Američkog kutka u Sarajevu, a svrha mu je bila otvoriti dijalog mladih o percipiranom nivou korupcije u obrazovanju u BiH, u kojim oblastima se javlja, na koji način se manifestuje ali i kako antikorupcijsko obrazovanje utiče na promjenu percepcije mladih o korupciji.



Također, forum je bio prilika da se šira javnost upozna sa rezultatima projekta **„Prevenција korupcije u obrazovanju: Više znanja, više transparentnosti“**, koji Udruženje CROA uz podršku projekta ACCOUNT-a implementira u više od 40 osnovnih škola u BiH.

Forumu su prisustvovali učenici i studenti iz OŠ „**Safvet beg Bašagić**“, OŠ „**Pofalići**“, JU „**Prva osnovna škola**“ Ilidža, JU „**Sedma osnovna škola**“ Ilidža, zatim učenici srednjih škola iz: JU „**Peta gimnazija**“, JU „**Srednja poslovno- komercijalna i trgovačka škola**“ i JU „**Četvrta gimnazija**“ Ilidža. Forumu su prisustvovali i studenti Pedagoškog fakulteta Univerziteta u Sarajevu, Fakulteta političkih nauka Univerziteta u Sarajevu, kao i Filozofskog fakulteta Univerziteta Pale.

Mladi su aktivno diskutovali, pokazali veliko interesovanje i želju da rade na prevenciji i sprječavanju korupcije u obrazovanju sa kojom se često susreću.

DODJELJENE ACCOUNT NOVINARSKJE NAGRADE

Žana Gauk i Semir Mujkić napisali najbolja istraživanja o korupciji

Ovogodišnji dobitnici ACCOUNT nagrade za najbolje istraživanje o korupciji u Bosni i Hercegovini su Žana Gauk za tekst „*Medicinski uređaji u BiH na izdisaju zbog korupcije i nestručnosti*“, objavljen na poslovnom portalu *Capital.ba*, i Semir Mujkić, novinar *Balkanske istraživačke mreže BIRN* za tekst i video prilog „*Djeca čekaju na sigurne golove zbog greške u slovima*“, objavljen na portalu *Detektor.ba*.

„*Velika je čast biti dobitnik, pogotovo što ovakvo priznanje dolazi od urednika medijskih kuća širom BiH. Nadam se da će naredne godine biti više novinara koji će se na ovaj način baviti novinarstvom, ne zbog nagrada, već da bismo ispunili naš zadatak – istražili, dokumentovali, ukazali na nepravilnosti, prozvali imenom i prezimenom i mijenjali stanje u društvu. Jer, ako nije istraživačko, nije ni novinarstvo*“, rekla je Žana Gauk, dobitnica ACCOUNT-ove nagrade za najbolje pisano istraživanje.

Semir Mujkić je dobio nagradu za najbolje istraživanje u multimedijalnim sadržajima, za pisani i video izvještaj o problemima vezanim za nabavku sigurnih golova u Federaciji BiH. Novac za nabavku sigurnih golova je izdvojen novac nakon pogibije dječaka u sarajevskom naselju Dobrinja u oktobru 2015. godine. Mujkić kaže da mu Novinarska nagrada ACCOUNT-a znači jako puno jer je gotovo nemoguće dobiti reakcije institucija na očite nepravilnosti koje novinari dokažu u tekstovima, pa je nagrada jedno od rijetkih priznanja novinarskog rada i prilika da priča dobije na važnosti.

Ove godine na konkurs je pristiglo 37 radova. U svom obraćanju na ceremoniji dodjele, Eldin Karić, izvršni direktor Centra za razvoj medija i analize, koji je nosilac projekta ACCOUNT, istakao je da žali zbog činjenice da je na konkurs pristiglo relativno malo prijava.



Siniša Vukelić, urednik *Capital.ba*, Žana Gauk, Eldin Karić, Semir Mujkić, Denis Džidić, urednik *Detektor.ba*



Denis Džidić, Semir Mujkić



Siniša Vukelić, Žana Gauk, Eldin Karić

„*Ovo pokazuje da je u BiH nizak nivo istraživačkog novinarstva, a razlog za to može biti u nedostatku finansijskih sredstava ili u činjenici da se mediji ne usuđuju istraživati teme na čijem kraju se nalaze ljudi koji upravljaju ovom državom*“, rekao je Karić i naglasio da je od početka ove godine ACCOUNT, zajedno sa desetak medija intenzivirao aktivnosti na istraživačkom novinarstvu, te izrazio nadu da će ove aktivnosti doprinijeti većem stepenu informiranosti javnosti.

U sastavu žirija za dodjelu ACCOUNT novinarske nagrade su bili Vildana Selimbegović, glavna i odgovorna urednica *Oslobođenja*, Gordana Milinković, urednica vijesti i zamjenica glavnog i odgovornog urednika *Nezavisnih novina*, Štefica Galić, glavna i odgovorna urednica portala *Tačno.net*, Radenko Udovičić, medijski ekspert i Amarildo Gutić, novinar *Online magazina Žurnal*.

Ovo je šesta godina za redom u kojoj ACCOUNT nagrađuje novinare za izuzetne napore u otkrivanju korupcije u BiH. Nagradom ACCOUNT želi promovisati istraživačko novinarstvo i podstaći medije da se bave ovim vidom novinarstva koji na najbolji način služi interesu javnosti.

Pročitajte detaljan izvještaj o dodjeli Novinarske nagrade ACCOUNT – ovdje.

KONFERENCIJA “REFORMA SISTEMA JAVNIH NABAVKI U BiH”

Građani ne vide korupciju “iz prve ruke”, ali je osjete kroz lošu ekonomiju

“Javne nabavke su najčešće navođeni problem u kontekstu sistemske korupcije. Ovo je uglavnom zbog toga što javne nabavke čine najveći dio ekonomske aktivnosti u zemlji. Korupcija u javnim nabavkama se mjeri milionima. Ja znam da građani ne vide iz prve ruke korupciju u javnim nabavkama, ali je osjete. Osjete je kroz lošu ekonomiju, nedostatak radnih mjesta i loš kvalitet socijalnih službi”, ocijenila je ambasadorica SAD u BiH Maureen Cormack, otvarajući Konferenciju *“Reforma sistema javnih nabavki u BiH”*, koju je 19. juna 2018. organizovao ACCOUNT u saradnji sa Transparency International i Agencijom za javne nabavke BiH. Ambasadorica Cormack je poručila da su civilno društvo i mediji dio rješenja.



Učesnici Konferencije, Sarajevo

“Vlada SAD podržava organizacije civilnog društva i novinare istraživače zato što oni predstavljaju građane. Oni čine dobro građanima kada zahtijevaju veću transparentnost i odgovornost u sistemu javnih nabavki ove zemlje. Oni su glas građana i vrijedan izvor ekspertize i spremni su da budu partner vlade u reformskom procesu”, kazala je Cormack.

Na Konferenciji su predstavljene aktivnosti institucija i organizacija civilnog društva na unapređenju Zakona o javnim nabavkama.

Đenan Salčin, direktor Agencije za javne nabavke, je rekao da su svjesni da postojeći Zakon ima nedostataka, te da je Radna grupa za izmjene Zakona o javnim nabavkama uradila svoj posao.

“Istaknuo bih tri ključne stvari koje se predlažu kroz izmjene: predložili smo uvođenje inspektorata za javne nabavke, radili smo puno na sukobu interesa, predložili smo uvođenje krivičnog djela u javnim nabavkama. Prijedlog Zakona nema alternativu. On se mora usvojiti ako želimo napredak”, naglasio je direktor Agencije.



Maureen Cormack, ambasadorica SAD u BiH

Direktor Antikorupcijske mreže u BiH ACCOUNT Eldin Karić je ocijenio da postojeći sistem javnih nabavki ne valja, da ACCOUNT svakodnevno otkriva zloupotrebe, te zahvalio Agencije za javne nabavke što je otvorila mogućnost nevladinom sektoru da se uključi u proces izmjena postojećeg Zakona o javnim nabavkama.

“Međutim, moram reći i da veliki dio prijedloga nevladinog sektora za izmjene Zakona nije razmatran. Radna grupa je išla za efikasnošću Zakona, a mi ka antikoruptivnosti. Također, Zakon je samo slovo na papiru, mi želimo efikasnije provođenje, što je zadatak svih institucija sistema, prvenstveno revizije i pravosuđa, a ne samo Agencije za javne nabavke”, kazao je Karić.

Lars Gunnar Wigemark, šef Delegacije Evropske unije u BiH je rekao da je i EU apsolutno prepoznala problem korupcije u javnim nabavkama.

“Važno je imati transparentan i pouzdan sistem javnih nabavki. Javne nabavke su prema Aquis-u jedno od 35 poglavlja koje BiH treba da prilagodi. Kada ove izmjene Zakona uđu u parlamentarnu proceduru, mi smo na raspolaganju da na zahtjev bh. vlasti damo mišljenje o kvalitetu predloženih izmjena”, rekao je Wigemark.

SARADNJA SA TIMOVIMA ZA BORBU PROTIV KORUPCIJE USK I POSAVSKOG KANTONA

Održane edukacije za izradu planova integriteta

ACCOUNT je nastavio uspješnu saradnju sa kantonalnim Timovima za borbu protiv korupcije. Nakon sarajevskog, obuke za izradu planova integriteta javnih ustanova, preduzeća i institucija organizovane su i u Unsko-sanskom i Posavskom kantonu. Obuke su održane 6. juna 2018. u Bihaću i 26. juna 2018. u Orašju. Plan integriteta je interni antikorupcijski dokument nastao kao rezultat samoprocjene izloženosti institucije rizicima za nastajanje korupcije, koruptivnog dejstva kao i drugih oblika nepravilnosti te neetičkog i neprofesionalnog ponašanja kojim se predviđaju mjere i aktivnosti pravne i praktične prirode u cilju prevencije i otklanjanja nepravilnosti uzrokovanih svim pojavnim oblicima korupcije i neetičkog ponašanja.

Razvoj planova integriteta u Republici Srpskoj

U Republici Srpskoj također je nastavljena izrada i usvajanje planova integriteta.

Izrada planova u 64 općine/grada u Republici Srpskoj, u 2017. godini, rezultirala je usvajanjem u 43 općine što je 53% od ukupnog broja.

Razvoj kapaciteta u lokalnoj upravi za izradu antikoruptivnih strateških dokumenata prije svega akcionih planova za borbu protiv korupcije na lokalnom nivou u Federaciji BiH kao i izradi planova integriteta u bh. entitetu Republika Srpska ostaje u fokusu Antikorupcione mreže nevladinih organizacija u BiH – ACCOUNT.

ACCOUNT provodi edukativne aktivnosti u saradnji sa Agencijom za prevenciju korupcije i koordinaciju borbe protiv korupcije (APIK)



Edukacija za službenike javnih institucija USK, Bihać

Održana BPP obuka za zaposlene u Centrima za pružanje besplatne pravne pomoći u RS

Predstavnici Fondacije INFOHOUSE u partnerstvu sa Ministarstvom pravde Republike Srpske, održali su u tom bh. entitetu prvu Obuku o besplatnoj pravnoj pomoći za zaposlene u Centrima za pružanje besplatne pravne pomoći u Banjaluci, Trebinju, Doboju, Bijeljini i Istočnom Sarajevu.

Tema obuke je uloga koju centri imaju u implementaciji Zakona o zaštiti prijavitelja korupcije Republike Srpske. Među ostalim, predstavnici ACCOUNT-ovog tima Besplatne pravne pomoći predstavili su praktične primjere i načine na koje se prijavitelji korupcije mogu zaštititi.

Pružanje besplatne pravne pomoći građanima od strane ACCOUNT-a ima višestruki značaj. Prije svega to se ogleda u činjenici da pravni savjetnici prilikom analize prijave korupcije mogu utvrditi postojanje elemenata krivičnih djela, i kod takvih slučajeva podnositi obrazložene krivične prijave nadležnim tužilaštvima, a što svakako može imati pozitivan efekat na sveopštu borbu protiv korupcije.

Pored toga, čak i u slučajevima kada pravni savjetnici ne utvrde postojanje krivičnog djela, mogu pružiti podnosiocima prijave određene pravne savjete i smjernice, a što je značajno za zaštitu subjektivnih prava ovih lica. Isto tako **“filtriranje”** prijave korupcije kroz pravnu pomoć ACCOUNT-a može imati pozitivan efekat na rad tužilaštava, s obzirom da će isti biti oslobođena određenog broja očigledno neosnovanih krivičnih prijava, a i prijave koje dobiju od strane ACCOUNT-a su adekvatno obrazložene što sve može pozitivno uticati na efektivnost rada tužilaštava.



Predstavljen model pravilnika zdravstvenim ustanovama u ZE-DO kantonu

U maju 2018. godine održana je stručna diskusija na kojoj je predstavljen model pravilnika za sprečavanje korupcije u zdravstvenim ustanovama u ZE-DO kantonu na nivou pet općina tj. pet domova zdravlja (Kakanj, Zenica, Žepče, Zavidovići, Vareš). Ustanove će razmatrati model pravilnika i prilagoditi određene odredbe veličini i kapacitetima ustanove.



Predsjedavajuća Tima Vlade ZE-DO kantona za borbu protiv korupcije, Meliha Omerspahić, naglasila je obavezu usvajanja ovakvog dokumenta od strane zdravstvenih ustanova, u skladu sa Akcionim planom i Strategijom ZE-DO kantona za borbu protiv korupcije.

INFOHOUSE objavio dvije publikacije koje su direktno vezane za tehničku podršku u realizaciji projektnih komponenti koje se odnose na javno zagovaranje legislativnih promjena i (ili) izrada antikoruptivnih akcionih planova na lokalnom nivou. To su:

<http://infohouse.ba/images/publikacije/vodic%20za%20nvo.pdf>

<http://infohouse.ba/images/publikacije/Kum%20analiza%20Infohouse%20pdf.pdf>



Vodič za predstavnike nevladinih organizacija:
Sve što ste ikad htjeli znati o Parlamentu a niste smjeli pitati



Konsolidovana analiza upitnika o samoprocjeni i preporuke za definisanje strateških ciljeva i mjera u okviru akcionog plana za borbu protiv korupcije na lokalnom nivou u devet općina

Žurnal prvi ukazao na manipulacije krivičnim zakonom Federacije BiH

Antikorupcijska mreža organizacija civilnog društva u BiH – ACCOUNT reagovala je povodom usvajanja Prijedloga Zakona o izmjeni i dopuni Krivičnog zakona Federacije BiH u Parlamentu FBiH. U [reakciji ACCOUNT-a](#) istaknuto je da je Žurnal prvi i jedini odmah nakon usvajanja Prijedloga Zakona o izmjeni i dopuni Krivičnog zakona FBiH u Parlamentu FBiH 19. juna 2018. godine objavio tekst **'Predstavnički dom usvojio izmjene zakona: Ukida se krivično djelo za koje su optuženi Sarajlić, Kukić i Zukić!'**, iz koga se jasno vidi da Prijedlog Zakona dekriminalizuje korupciju umjesto da bude ključni alat za njeno procesuiranje. U tekstu Žurnala je argumentovano predstavljena pozadina predlaganja ovakvog zakonskog rješenja, a to je onemogućavanje procesuiranja visokih političkih zvaničnika u Federaciji Bosne i Hercegovine, Asima Sarajlića, poslanika u Parlamentu BiH, Mirsada Kukića, poslanika u Parlamentu FBiH i Amira Zukića, poslanik u Parlamentu FBiH.



NOVI ŽURNAL DOSSIER

TV ŽURNAL PRIKAZUJE

Kriminal u Fondu za zapošljavanje osoba sa invaliditetom



Na Žurnalu čitajte dossier o tome [kako je Fond za profesionalnu rehabilitaciju i zapošljavanje osoba sa invaliditetom, na čelu sa nezakonito imenovanim direktorom, samo u posljednje tri godine potrošio više od 50 miliona maraka budžetskog novca](#). Žurnal donosi seriju tekstova o tome kako su [SDP-ovi kadrovi trošili poticaje na automobile, poslovne prostore i kupovinu solarija](#), kao i to kako su [SDA kadrovi novac od poticaja trošili na automobile i pokrivanje lošeg poslovanja](#), te kako je [direktorski lanac raspolagao milionima maraka](#). U dossieru objavljujemo kojim će [kojim će firmama novac iz Fonda biti dodijeljen ove godine](#)

Novinari Žurnala istraživali su i [organizovanje kriminalne grupe "Brigada", zloupotrebe u poreskoj upravi Republike Srpske](#), kao [član Predsjedništva BiH Dragan Čović javnim novcem plaća putovanje na Svjetsko prvenstvo u fudbalu](#), a istraživana je i [utaja poreza u prijedorskom "Acelor Mittalu"](#), kao i [brojne druge zloupotrebe javnih sredstava](#).

Čitajte Žurnal!

Država protiv Davida



Žurnalov film "Država protiv Davida" rekonstruiše posljednje sate života Davida Dragičevića, poredeći kontradiktorne policijske nalaze sa dokazima koje posjeduje porodica, te ukazuje na svojevrsan fenomen građanskog bunta grupe "Pravda za Davida". Dvadesetjednogodišnji David Dragičević pronađen je mrtav 24. marta ove godine. Policija njegovu smrt tretira kao nesretan slučaj ili samoubistvo. Dodatno su Davida okarakterisali kao pljačkaša i narkomana. Više od dva mjeseca Davidov otac Davor sa prijateljima i hiljadama pojedinaca okupljenih u grupu „Pravda za Davida“ ukazuju da je prava istina sadržana u nekoliko rečenica : David Dragičević nije samoubica! David Dragičević nije pljačkaš! David Dragičević nije narkoman! David Dragičević je ubijen!

Za film govore Davor Dragičević, Borislav Radovanović, Slobodan Vasković, Darko Culum, Daniela Ratešić, Emilija Zebić, Marija Popović, Jelena Komljen.

Film "Država protiv Davida" pogledajte [ovdje](#).
Film je dostupan i na engleskom jeziku [ovdje](#).

ACCOUNT MEDIA POOL OTKRIVA I ISTRAŽUJE

40 novih priča o korupciji

ACCOUNT Media pool je u toku maja i juna objavio više od 40 istraživačkih priča korupciji u Bosni i Hercegovini. Novinari su istraživali [o zloupotrebama u javnim nabavkama sa fokusom na nabavku reagenasa, kriminalnoj privatizaciji i propasti banjalučke privrede, uticaju Islamske zajednice na pravosuđe, političkim zloupotrebama u zdravstvu Republike Srpske, poslovanju porodičnih firmi poznatih političara, zloupotrebama u studentskim udruženjima, korišćenju javnih sredstava za političku propagandu, zviždačima koji su u nemilosti pravosuđa, zloupotrebama u sportskim organizacijama, zloupotrebama u oblasti koncesija, ljekarskim greškama za koje niko ne odgovara, zloupotrebama šumskih resursa, sumnjivim tenderima u elektroenergetskom sektoru i mnogim drugim.](#)

Članice ACCOUNT Media poola su: Capital.ba, Buka, eTrafika, Gerila, Inforadar, Moja Hercegovina, Tačno.net, B1 Info, Frontal.ba, Direkt.



Predstavljen Akcioni plan za borbu protiv korupcije u općini Ilijaš

U zgradi Općine Ilijaš danas je predstavljen Akcioni plan za borbu protiv korupcije na lokalnom nivou i potpisan je Strateški dokument u kojim su definisane mjere prepoznavanja i sprječavanja korupcije.

Akcioni planovi su urađeni u okviru projekta *"Izgradnja kapaciteta nevladinih organizacija i odabраниh općina na izradi strategija za borbu protiv korupcije na lokalnom nivou"*, a uz podršku Američke agencije za međunarodni razvoj u BiH (USAID). Projekt realizuje Antikorupcijska mreža u BiH – ACCOUNT u suradnji s Udruženjem za lokalne razvojne inicijative (ALDI) i Fondacijom INFOHOUSE.

Direktorica Udruženja ALDI Meliha Gačanin kazala je kako je sretna što su aktivnosti u vezi ovog projekta završene, te što su izrađeni akcioni planovi koji će koristiti u svrhu prevencije korupcije.

„Izuzetno mi je drago da smo potpisali Akcioni plan i time smo na neki način doveli do kraja ovu aktivnost. Izrađen je Akcioni plan koji će koristiti Općini Ilijaš da u okviru svojih institucija ima prevenciju korupcije koja je u svim segmentima našeg društva. S ovakvim dokumentom možemo dovesti do toga da se to spriječi i da se prije svega uradi prevencija“, kazala je Gačanin.

Načelnik Općine Ilijaš Akif Fazlić je kazao kako kontinuirano radi na izgradnji imidža ove Općine. Istaknuo je da Akcioni plan predstavlja smjernice za rad svakom radniku.

„Direktno smo radili s nevladinom organizacijom ALDI. Želimo da iskažemo naše opredjeljenje prema problemu korupcije u našem društvu. Akcioni plan je dokument koji daje smjernice za rad svakom uposleniku. On definira i korake i jedan drugačiji pogled i viziju kada je u pitanju korupcija“, rekao je Fazlić.

Predstavnik Fondacije INFOHOUSE Adin Šabić čestitao je načelniku ove Općine na opredjeljenju da se suprotstavi korupciji.

„Korupcija predstavlja značajan problem našega društva stoga je važno da se borimo protiv nje. Fondacija INFOHOUSE podržava opredjeljenje načelnika općine Ilijaš kada je u pitanju potpisivanje ovog strateškog dokumenta, jer samim time pokazuje da teži ka većoj transparentnosti u poslu kojim se bave“, rekao je Šabić.

Akcioni plan za borbu protiv korupcije sastoji se od 6 strateških ciljeva u sklopu kojih su definisane 23 mjere sa tačno određenim nosiocima aktivnosti i vremenom koje je predviđeno za njihovu implementaciju. Glavni akcent ovog strateškog dokumenta stavljen je na prepoznavanje opasnosti od korupcije kao jednog od najvećih problema u društvu.

Cilj dokumenta je da se njegovom provedbom unaprijedi efikasnost, efektivnost i učinkovitost rada lokalne uprave. Općina Breza se izradom ovog strateškog dokumenta pridružila grupi od 28 općina i gradova u BiH koji su do sada učestvovali u izradi akcionih planova za borbu protiv korupcije.



Predstavljanje Akcionog plana u Općini Ilijaš

U Brezi predstavljen Akcioni plan za borbu protiv korupcije

Danas je u općini Breza upriličena prezentacija i predstavljanje Akcionog plana za borbu protiv korupcije na lokalnom nivou, kao i potpisivanje Strateškog dokumenta u kojem su definisane mjere prepoznavanja i sprječavanja korupcije. Akcioni plan je urađen u okviru projekta *"Izgradnja kapaciteta nevladinih organizacija i odabраниh općina na izradi strategija za borbu protiv korupcije na lokalnom nivou"*.

Uz podršku Američke agencije za međunarodni razvoj u BiH (USAID), projekt realizuje Antikorupcijska mreža u BiH - ACCOUNT, a realizuje Udruženje za lokalne razvojne inicijative (ALDI) u suradnji s Fondacijom INFOHOUSE.

U proteklom periodu Radna grupa Općine Breza, koju su sačinjavali predstavnici općine Breza Almir Dervišević i Dijana Vrljićak i Azra Zorlak iz Udruženja ALDI Goražde, intenzivno su radili na izradi Akcionog plana za borbu protiv korupcije. U ovom procesu, pored tehničke podrške, Udruženje ALDI radilo je na izgradnji institucionalnih kapaciteta, razmjeni informacija i promociji.

Prezentaciji su, osim članova Radne grupe, prisustvovali i načelnik Breze Munib Zaimović, izvršna direktorica Udruženje ALDI Meliha Gačanin, šef Službe za privredu Općine Breza Salih Hasanspahić, predstavnik Fondacije INFOHOUSE Adin Šabić.



Predstavljanje Akcionog plana u Općini Breza

Interview.ba – Čitaj više...



Krivični zakon FBiH: Koruptivno ili bolje sutra?

<http://interview.ba/vijesti/item/6885-teme-krivicni-zakon-fbih-koruptivno-ili-bolje-sutra>

Piše: Abela Purivatra za Interview.ba

„Konkursi za rodbinu, stranačka zapošljavanja, male ili velike usluge za poznanike ili jednostavno ona stara narodna "Ko će kome ako neće svoj svome". Sve ovo, ako se ne mogne dokazati novčana korist, neće biti kažnjivo u Federaciji BiH, ukoliko se u Domu naroda FBiH potvrde usvojene izmjene Krivičnog zakona FBiH koje se tiču trgovine utjecajem. A za to je potrebno 28 ruku.“

Predstavnički dom: Odobren Nacrt zakona o zaštiti prijavitelja korupcije

<http://interview.ba/vijesti/item/6576-predstavnicki-dom-odobren-nacrt-zakona-o-zastiti-prijavitelja-korupcije>

„Ovaj zakon predložila je Federalna vlada i propisala zaštitu osobama koje se odluče prijaviti korupciju, što, također znači zagarantiranu anonimnost prilikom prijavljivanja korupcije kao štetne radnje ili krivičnog djela (ako prijavitelj smatra da je, u konkretnom slučaju, korupcija zadobila i takvu težinu).“

Pročitajte šta piše u Nacrtu zakona o zaštiti prijavitelja korupcije

<http://interview.ba/vijesti/item/6418-procitajte-sta-pise-u-nacrtu-zakona-o-zastiti-prijavitelja-korupcije>

„Pojam "korupcija" u ovom nacrtu zakona je definiran kao "svako činjenje ili nečinjenje izvršeno zloupotrebom službenih ovlaštenja ili službenog položaja u privatne svrhe, radi sticanja protivpravne imovinske ili bilo koje druge koristi za sebe ili drugoga, koju poduzima odgovorno lice ili lice koje je radno angažirano u javnom ili privatnom sektoru.“

U BiH procesuirano tek 8.5% povratnika sa stranih ratišta

<http://interview.ba/vijesti/item/6348-teme-u-bih-procesuirano-tek-8-5-povratnika-sa-stranih-ratista>

Piše: Abela Purivatra za Interview.ba

„Bosna i Hercegovina je prva zemlja u regionu, a i među prvima u Evropi, koja je 2014. godine izmjenama Krivičnog zakona BiH, zakonski zabranila odlazak na strana ratišta te uvela kazne za one koji prekrše ovu odredbu. No i ovaj je zakon, kao i mnogi drugi, u praksi zakazao. Prema podacima, koje je za Interview.ba potvrdio portparol Tužilaštva BiH Boris Grubešić, u BiH su procesuirane tek 24 osobe koje su optužene za odlazak na strana ratišta i pridruživanje stranim paravojnim ili parapolicijskim formacijama. To u praksi znači da je od ukupnog broja onih koji su otišli pa se vratili, procesuirano tek 8.5% osoba.“